

# EBBALUWA OPAWULO EGIYAWANDIIKIIRE AB'E FIRIPI **Enyanjula**

OPawulo niye eyawandiikiire abaikirirya b'e Firipi ebbaluwa eenu omu mwanka gwa 61, nga bamalire okubyala oKurisito. Yagiwandiikire ng'ali mu mabbuusu (1:13), era ali ooti yabbaire mu Looma. OFiripi kyabbaire ni-ikyo ekibuga ekikulu eky'omwitwale ly'e Make- dooniya. OPawulo aamo n'oSiira niibo abatandi- ikire ekanisa eyo (Bik 16:16-40). Era niyo ekanisa egibasookere okutandiika omwitwale ly'e Makedooniya.

OPawulo ali ooti yabbaire n'ebigendererwa ebyeraku ebyagirire n'awandiika ebbaluwa eenu. Ekisooka yakoleserye ebbaluwa eenu okwebalya ekanisa olw'ebirabo ebibamuweereirye nga bawuliire bati ali mu mabbuusu (4:10-19). Ekyokubiri yatakire okumanyikisya abaikirirya embeera egiyabbairamu omu mabbuusu. Era yasindikire oTemuseewo n'Epafuladiito eeri ekanisa, era n'abawa ebbaluwa ebanjula bayezye okubaaniriza, era n'okuwa obwekubbemberi bwabwe ekitiisya (2:19-30).

## **Engeri egibyecaanamu**

1. Obusugirye eeri ekanisa (1:1-2).
2. Amawuliro agakwata okumbeera oPawulo egiyabbairamu (1:3-2:30).

3. OPawulo awa ebyokulungamya (3:1-4:9).
4. OPawulo amaliirirya nga yeebalya ekanisa (4:10-23).

### *Obusugirye*

<sup>1</sup> Nze oPawulo nga ndi n'oTemuseewo omuweererya omunange owa Kurisito oYesu, mbawandiikira inywe abantu ba Kibbumba abali omu kibuga ky'e Firipi, abali ekintu ekimo n'oKurisito oYesu. Era mpandiikira n'abalabirizi aamo n'abadikoni.

<sup>2</sup> OKibbumba oItewaiswe n'oMusengwa oYesu Kurisito babakwatire ekisa era babawe eidembe.

### *Okwebalya n'okusaba oKibbumba*

<sup>3</sup> Neebalya oKibbumba wange buli owembeebukirya,

<sup>4</sup> era buli owembasabira oKibbumba nywenanywena, nsaba n'eisangaalo.

<sup>5</sup> Ekyo kityo olw'okubba okuzwera nakimo oku lunaku obumwaikiriirye aMawuliro aMasa paka atyanu, mwemereire aamo na nze omu kugasasya.

<sup>6</sup> Era nkakasira nakimo n'obugumu nti oKibbumba eyatandiikire omulimo omusa mwinywe yeeyongera okugukola paka oweyaligumaliirirya oku lunaku oKurisito oYesu oluyaliriraku.

<sup>7</sup> Kale mbaseegaku bulijo n'eisangaalo, era ikyo kituuce nze okwewulira ntyo omu mwoyo gwange okulwanywe nywenanywena. Ekyo kityo olw'okubba nti nywenanywena mugabanira aamo na nze ekisa oKibbumba ekiyankwatiire

omu busibe bwange, n'omu kulwanirira amazima g'aMawuliro aMasa.

<sup>8</sup> OKibbumba iye mujulizi, w'okubataka okwembatakamu nywenanywena okuli ooti kuudi oKurisito oYesu okwabatakamu.

<sup>9</sup> Era ekimbasabira eeri oKibbumba niikyo kinu ekiti; okutakangananga kwanywe kweyongerengemu amaani era mweyongerenge okukula omu malabuki n'okutegeera.

<sup>10</sup> Ekyo kityo olw'okubba ntaka mumanyice ekikira obusa kaisi mwezye okubba n'obwomi obukenene era ababulaku ekyokubanenya paka olunaku oKurisito Yesu oluyaliiriraku.

<sup>11</sup> Era olwo lutuuke nga mwizwire ebikole by'obutuukirirye ebimusuna okubita omu Yesu Kurisito olw'okuweisya oKibbumba ekitiisya n'okumuwuja.

### *Eisangaalo lya Pawulo*

<sup>12</sup> Era boluganda abatake ntaka mumanye muti; ebigosi ebimbitiremu byongeire okubbeera omu kusasya aMawuliro aMasa.

<sup>13</sup> N'olwekyo, kimanyikanire kusani omu baisirikale bonabona abakuumi b'ekitebe ekikulu eky'e Looma era n'abantu abandi bonabona ab'omu kibuga ekyo kiti ndi omu mabbusu olw'okubba ndi musengereri wa Kurisito Yesu.

<sup>14</sup> Era olw'obusibe bwange, aboluganda omu Musengwa oYesu abakira obungi basunire obugumu okulaabba ekibono kya Kibbumba anambula kutya.

<sup>15</sup> Cooka ikyo kituuce kiti abandi balaabba oku Kurisito lw'engongi n'olw'ekinakoolo, neye ibo abandi bakikola mu mwoyo musa.

<sup>16</sup> Era abo bakikola omu mwoyo omusa lwa kuntaka, olw'okubba bamaite bati oKibbumba yanteekerewo kulwanirira mazima g'aMawuliro aMasa.

<sup>17</sup> Neye badi ibo abakikola olw'engongi, ebya Kurisito tibabiraabba omu bantu mubuteereeri neye balaabba mubutakolera aamo. Nga baseega bati mwebyo byezya okunzweramu ebigosi omu busibe obundimu.

<sup>18</sup> Neye nze-so tinfaayo olw'ekibataka kintuukeku. Kale abba lw'ebigendererwa bya bubbeyi ooba by'amazima, ekikulu kasita balaabba aMawuliro aMasa. Era olw'okubba bagalaabba nze njaagaana-bujaagaani.

Kituuce, era neyongera okujaagaana,

<sup>19</sup> olw'okubba mmaite nti inywe muli kunsabiranga n'olw'obubbeeri bwa Mwoyo azwa eeri oYesu Kurisito. Era olw'okugada okundi kubitamu n'olw'abantu okulaabba aMawuliro aMasa byalinzweramu okunnunula.

<sup>20</sup> Era njunjumiriire tete n'okubba n'eisuubi nakimo nti tinaliswala kadi omu ngeri yonayona. Neye naabba mugumu ekimala nga nenca kaisi oKibbumba agulumalye oKurisito mu byonabyona ebintumula n'ebinkola nga ndi mwomi n'engeri eginalfaamu.

<sup>21</sup> N'olwekyo okulwange, ekigendererwa eky'okubba mwomi, nze kuweererya Kurisito, era n'owenfa kingasa ino n'okukirawo.

<sup>22</sup> Neye singa neyongera okubbaawo omu bwomi bwa mubiri, kale mba mpezya ok-

weyongera okubba wa mugaso omu Kurisito. N'olwebyo mba timmaite ekimpomera okulondaku.

<sup>23</sup> Ekyo kitegeeza kiti kiri kubbanga kigosi nze okusalawo ekyokulondaku ekimo oku bintu binu ebibiri. Neegomba okuzwa omu bwomi bunu obw'oku kyallo, njabe mbe n'oKurisito, ikyo ekyo ekikira nakimo obusa.

<sup>24</sup> Neye tete kibagasa ino niinywe singa nze nsigala omu bwomi wa mubiri.

<sup>25</sup> Era kinu niikyo ekiimmatiza kiti nasigalawo nga ndi mwomi era n'okweyongera okubabbeera nywenanywena. Ikyo ekyo kyabazweramu inywe okukula aamo n'eisangaalo omu kwikirirya.

<sup>26</sup> Ekigendererwa mwekyo kiri kiti owenali-ira eeyo egimuli, mwalyeyongera okusangaalira oKurisito Yesu okulwange.

<sup>27</sup> Kale tinsonga ooba niki ekibbaawo, inywe mukolenge ebikole ebisaanira abantu abaikiri-irye aMawuliro aMasa agakwata oku Kurisito. Kaisi awo owenalibba njizire okubabona ooba kubawuliraku-buwuliri nga mbulayo, mpulire nti mwemereire n'obugumu, era nga muli n'enseega moiza, nga mulwanirira okwikirirya olw'aMawuliro aMasa.

<sup>28</sup> Timwatyanga abo ababagadya. Bulijo mubbenge bagumu, ng'aako iko kamanyiciryo akalaga kati ibo abo ababagadya, oKibbumba yalibajigirica, neye nga kalaga inywe Kibbumba kubalokola. Era oKibbumba niiye agira ebyo byonabyona ni bibbaawo.

<sup>29</sup> Ekyo kityo olw'okubba oKibbumba

tiyabawaire inywe kwikirirya mu Kurisito kwonkani neye era n'okugada olwa Kurisito.

<sup>30</sup> Ekyo kiri kubazweramu atyanu na inywe nywena okubba omu kugada ooti kuudi okumwamboine nga mbitamu, era n'atyanu okumubulira muti kunkaali ndimu.

## 2

*Okwewombeeka kwa Kurisito n'okumugulumalya*

<sup>1</sup> N'olwekyo, olw'okubba nti mwiramu amaani lwa kwesiga Kurisito, era okutakakwe kubagumya, era mukolera aamo n'omwoyo oMutukulye, era mukwatirangana ekisa era musaasirangana owewabbaawo agada,

<sup>2</sup> aale musangaalire nakimo nga mubba n'enseega moiza. Era nga mubba n'okutakangana ino, nga mwikiriziganya n'omwoyo gumo era nga muli kintu kimo omu mwoyo n'omu biseego byanywe.

<sup>3</sup> Timwakolanga ekintu kyonakyona olw'engongi ooba omu malala, neye mukolenge mu buwombeeki nga muwa abanaanywe ekitiisya ekikiraku ekyo inywe abanyere ekimwewa.

<sup>4</sup> Mutyo buli moiza kwinywe tiyaafangayo ku byetaago bibye byonkani, neye afenge n'oku by'abandi.

<sup>5</sup> Kale muli n'okubba n'enseega ooti ya Kurisito Yesu egiyabbaire nayo:

<sup>6</sup> Iye oyo eyabbaire n'ekikula kya Kibbumba,

- tiyaseegereku oku mwenkanonkano  
 n'okibbumba ng'ekintu ekyayezya  
 okuleka,  
 7 neye yeerekerezere ekitiisya, n'asuuka ooti  
 muweererya.  
 Atyo n'asuuka muntu nga iswe.  
 8 Era oweyasuukire ooti muntu, yeewombekere,  
 kaisi n'agondera okibbumba paka  
 n'okwikirirya okufa  
 aate okufa okw'oku musalabba.  
 9 N'olwekyo okibbumba kiyazwireku  
 n'amugulumalya einu,  
 n'amuteeka omwigulu omu kifo ekikirira  
 nakimo okubba eky'ekitiisya,  
 era n'amuwa eriina ery'ekitiisya okukiraku  
 amaliina gonagona.  
 10 Kaisi awo ebiri omwigulu, n'ebiri oku kyalo,  
 era n'ebiri ansi w'ekyalo,  
 byonabyona bikome amazwi  
 n'obuwombeeki okusinza eriina lya Yesu,  
 11 era buli muntu yalibbutula omulwatu ati,  
 "OYesu Kurisito niye oMusengwa."  
 Era n'olwekyo abantu bonabona baligu-  
 lumalya okibbumba otewaiswe.

*Okubba ekitangaala omu kyalo*

- 12 N'olwekyo, bainange abatake,  
 ng'owemugonderanga okibbumba bulijo,  
 ekikoba nti, tinga ndiwo lwonkani, neye  
 n'atyanu ng'owembulayo, musingisyekuuwo  
 n'okusingisyaku. Buli muntu iye onyere  
 yeefudengeku ino okukola ebintu ebiraga biti

oKibbumba yamulokoire. Ekyo mukikolenge mukutya Kibbumba nga mumuwa ekitiisya eky'amaani.

<sup>13</sup> Ekyo kityo olw'okubba oKibbumba niiye akolera mu buli mwikirirya okumwezyesya okubba n'okutaka okukola era n'okukola ebisa oKibbumba ebyataka.

<sup>14</sup> Kale byonabyona mubikolenge anambula okwezuluguma ooba okwakanisyangana,

<sup>15</sup> kaisi awo mubbe batukulye nga mubulaku ekyokubanenya. Era mwabba baana ba Kibbumba ababulaku eitondo, nga muli omu mulembe gw'abantu abakola ebibbibbi era ababebenyeki. Muteekwa okuboneka mwibo nga muli ooti nkota egyaka angulu omwibbanga,

<sup>16</sup> nga mulaabba egibali ekibono eky'obwomi. Ekyo kyalimpezyesya okwewuuja oku lunaku oKurisito oluyaliriraku, nga nkoba nti tinakalabaniire bwereere.

<sup>17</sup> Atyanu owebabba bawaayo esadaaka eeri oKibbumba, basuka ekyokunywa okwongererya oku sadaaka. Kale zena n'owekwabba kunjita n'omusaaye gwange ni gususuka naabba ooti kyokunywa ekyo ekibasuka okwongererya oku sadaaka era kyabba kyongererya ku sadaaka n'obuweererya obuzwa omu kwikirirya kwanywe. Era ekyo kyansangaalya ni nesiima na inywe nywenanywena.

<sup>18</sup> Kale n'omu ngeri enanyere eyo nywena muteekwa okusangaala, n'okujaaganira aamo na nze.

*Ebikwata oku Temuseewo n'Epafuladiito*



19 Neye nsuubira okubatumira oTemuseewo mangu singa oMusengwa oYesu Kurisito oweyaabba atakire atyo, kaisi njiremu amaani nga mmalire okuwulira ebibafaaku.

20 Cooka mbula omuntu ogondi aali n'ebiseego ebifaanana n'ebyang'e ng'oyo era ayezya okubalumirwa eino nga iye.

21 Ekyo kityo olw'okubba abandi bafa ku byabwe byonkani, tibafaayo n'oku bya Yesu Kurisito.

22 Neye mumaite muti oTemuseewo muweererya atuukana, era aweererya aamo na nze omu kusasya aMawuliro aMasa, ooti mwisuka abbeera oiteeye.

23 Kale n'olwekyo nsuubira okumutuma egimuli, amangu ago nga nankumanya ekyaba okuntuukaku.

24 Era nkakasa nti oMusengwa oweyaabba atakire atyo, nze zena onyere n'aiza eeyo mangu.

25 Neye nseega nti kyetaagisya okubasindikira Epapuladiito okwiraku egimuli, iye oyo nago owoluganda, era omuweererya omunange aali ooti mwisirikale eyaneimbiryeku okulwanirira aMawuliro aMasa, omukwenda waanywe ogumwantumiire okwiza okumbeera era n'okungabirira omu binabbaire neetaaga.

26 Ekyo kityo olw'okubba yeegomba ino okubabonaku nywenanywena, era abbaire mweraliikiriri ino olw'okubba mwawuliire ng'oweyalwaire ino.

27 Ikyo ekyo kituuce kiti Epapuladiito yalwaire, era yabbaire abulaku katono kati kufa. Neye oKibumba yamukwatiire ekisa, era tini-

iyе yenkani, neye na nze zena yakinkwati-ire, n'ammalaku enima ey'okulwalakwe era n'okundamya enima tete eginankubbaire nayo singa yabbaire afiire.

<sup>28</sup> N'olwekyo njunjumiriire leero ino okubasindikira Epafuladiito aireku eeyo egimuli, kaisi awo musangaale nga mumuboineku, era na nze zena kaisi omwoyo guwukukeku.

<sup>29</sup> Kale mumwanirize n'eisangaalo lingi ng'owoluganda omu Musengwa waiswe. Era abali ooti yooyo mubawenge ekitiisya,

<sup>30</sup> olw'okubba iye yabbaire abulaku katono okufa ng'ali oku mulimo gwa Kurisito, oweya-jaaliire obwomibwe n'aiza okumbeera omu kifo kyanywe.

### 3

#### *Obutuukirirye obunanyerenyeere*

<sup>1</sup> Okwongera kwekyo, boluganda, musangaalirenge omu Musengwa oYesu. Kaisi era tikigosi nze okwiramu okubawandiikira kwebyo ebinabawandiikiireku eira, ekyo kityo olw'okubba ebintu ebyo byabakuuma eeri abegegi ab'obubbeyi.

<sup>2</sup> Kale mwekuumenge abo abali ooti mbwa, abo abakola ebibbibbi, era abo abakomola omubiri-obubiri.

<sup>3</sup> Kiri kiti, niiswe abakomole abatuuce, olw'okubba tusinza oKibbumba ng'oMwoyowe niye atulungamya, era nga tujaaganira mu Kurisito Yesu. Kale titwesiga bulombolombo abantu obubakola oku kyalo,

<sup>4</sup> waire nga nze onyere ndi n'ensonga okwesiga obulombolombo obwo. Era ewabbanga waliwo omuntu aseega ati ali n'ensonga egira ni yeesiga obulombolombo obubakola oku kyalo, nze mba mmukiraku.

<sup>5</sup> Ekikoba nti, nze bankomoire ku lunaku olwomunaana okuzwa oku lunaku olubambyaliireku, era eigwanga lyange ndi Mwisirairi, ow'ekika kya Bbenyamini, era ndi Mwebbulaniya oibbati, omwana wa Mwebbulaniya ondiko. Nze nabbaire mu kibbula ekikira okukwata amateeka g'ekiyudaaya ikyo nago eky'aBafalisaayo.

<sup>6</sup> Kale nze era olw'eiganyi eribitiriri ery'okuwa oKibbumba ekitiisya, nayiigaanianga ekanisa, era nakwatanga amateeka g'ekiyudaaya gonagona, ni watabbaawo anvunaana olw'okuvuna eiteeka lyonalyona.

<sup>7</sup> Neye ebyo byonabyona ebinakolanga nga nseega nti bya mugaso egyendi, atyanu mbibona nga ebitagasa olwa Kurisito.

<sup>8</sup> Dala ebintu ebyo byonabyona owembigeragerania mbona nga tibigasa, olw'omugaso omubitiriri eino ogubambikuliire okutegeera oKurisito Yesu oMusengwa wange. Olwa Kurisito oyo nalekere ebintu byonabyona, era nze mbi-bona ng'ebisubi ebitagasa, olwo kaisi mbe muntuwe,

<sup>9</sup> era mbeere nakimo mu niiye, nga mbula butuukirirye obwange oku bwange obuzwa omu kukwata amateeka g'ekiyudaaya, neye obwo ibwo obuzwa omu kwikiririrya omu

Kurisito. Ekikoba nti, obutuukirirye obwo obuzwa egiri oKibbumba n'omuntu n'abusuna lwa kwikiririrya mu Yesu.

<sup>10</sup> Kale ntaka oKurisito yanebikulire era zena mbe n'amaani ago agamuzuukizire n'okubba zena omu kugada nga yena oweyagadire, era ntuuke okubba ooti niye omu kufaakwe,

<sup>11</sup> nga ndi n'eisuubi nti nze zena oKibbumba yalinzuukiza.

### *Obwomi obw'omwigulu*

<sup>12</sup> Aale atyanu tintegeeza nti ebyo mmalire okubisuna, ooba nti mmalire okutuukirira, neye njaba mumaiso, nga neefudaku ino n'amaani okusuna ekirabo ky'obwomi, ikyo ekyo oKurisito oYesu ekiyagendereire omu kunsuuka owuwe.

<sup>13</sup> Kale boluganda mmaite nti nkaali okutuukirira, neye ekinkola, nerabira ebyabitire ni ndwanikanira biidi ebiri omumaiso eeyo.

<sup>14</sup> Era nze neyongerera kulwanikana nga njaba mumaiso, ntuuke abantu egibanuwirira aawo awali ekirabo eky'obwomi obw'omwigulu, ikyo oKibbumba ekiyanjeteire omu Kurisito Yesu.

<sup>15</sup> N'olwekyo swenaswena abakulire omu mwoyo, tubbenge n'enseega eetyo. Era singa omoiza kwinywe abba n'ekyanjakanisya mwebyo, n'ekyo kyona oKibbumba yalikimutegeeresya.

<sup>16</sup> Neye mu byonabyona, oleke tukolenge kwebyo oKibbumba ebyabba amalire okutubikulira.

17 Kale boluganda, nywenanywena aamo muli n'okubonera ku ninze, era mwegere kwabo abeebitya omu ngeri iswe egitwebityamu.

18 Ekyo kityo olw'okubba kiti, ng'owenabbaire mmalire okubakoberaku enyuma eedi, era tete n'atyanu mbakobera nga leero nkunga n'amaliga nti, waliwo bangi ibo abaakanisirya nakimo amawuliro agakoba gati oKurisito bamukomereire era n'afeera oku musalabba.

19 Cooka ibo abo enkomerero yaabwe, kwalibba kujigirika olw'okubba ebintu ebibayayaanira omu bwomi bwabwe byasuukire niibyo oKibbumba waabwe. Era ibo beegulumalirya mu bintu eby'ensoni nago ebyo ebibakola, n'ebiseego byabwe babimalira ku bintu by'ekyalo kinu.

20 Neye iswe obutyami bwaiswe buli omwigulu. Era tukuumiriire n'okujunjumirira tuti eeyo niiyo oMulokoli era oMusengwa oYesu Kurisito egiyalizwera okwira.

21 Era yalisuuca emibiri gyaiswe ginu eminafu egifa, ni gibba ooti gugwe ogw'ekitiisya ogutafa. Ekyo yalikikola ng'akolesya amaani ago agamwezyesya okufuga buli kimo.

## 4

### *Ebyokulungamy*

1 N'olwekyo boluganda, inywe abentaka era abeneegomba okubonaku, inywe eisangaalo lyange era abeneenyumiriziramu, eyo niiyo engeri egimuteekwa okukalangukira omu

kwikirirya oMusengwa, bakaagwa bange abatake.

<sup>2</sup> Negairira Ewudiya n'oSuntuke baikiriziganye ng'aboluganda omu Musengwa oYesu.

<sup>3</sup> Era mazima nkusaba iwe, omukoli omunange omwesigwa,\* okubbeera abakali abo baikiriziganye, olw'okubba bakoleire aamo na nze omu mulimo gw'okulaabba aMawuliro aMasa. Abo aamo n'oKerementi, era n'abakoli abainange abandi, bona amaliina gaabwe amawandiike omu kitabo ky'abantu abali n'obwomi obutawaawo.

<sup>4</sup> Musangaalirenge omu Musengwa bulijo. Tete njiramu okubakoba nti musangaalenge.

<sup>5</sup> Mubbenge bawombeeki eeri abantu bonabona. Mwebukirye muti oMusengwa ali kumpi okwira.†

<sup>6</sup> Timweraliikiriranga olw'ekintu kadi kimo, neye omu mbeera yonayona musabenge oKibbumba era mumwegairirenge, era mumwebalyenge, era ebimutaka mubimusabenge niye.

<sup>7</sup> Era eidembe oKibbumba eryatuwa erikira okutegeera kwaiswe, lyakuumanga emyoyo gyanywe n'ebiseego byanywe omu Kurisito Yesu.

<sup>8</sup> Boluganda ekisembayo musegenge ku bintu ebisa ebisaanira okuwuujja; ebintu eby'amazima, ebireetera abantu okubawa ekitiisya, ebintu ebituuce, ebitukulye, ebisangaalya, abantu ebibataka, era ebibeegomba.

---

\* **4:3 4:3** Omu Luyonaani babbaire bamweta bati, *Siizigaasi*.

† **4:5 4:5** Ooba, *Ali kumpi aawo na inywe*.

9 Ebyo ebinabeegeserye n'ebinabawaire ooba ebimwawuliire nga ntumula ooba ebimwamboinemu, ibyo mubiteekenge omunkola. Era oKibbumba atuwa eidembe yaabbanga na inywe.

### *Okwebalya olw'ebirabo byabwe*

10 Nsangaala ino omu Musengwa oYesu olw'okubba atyanu, ng'owewamalire okubitawo ekiseera, tete mwiriryewo okulagaku muti munfaaku. Mazima nenca mubbaire munfaaku, neye nga mubula enkabi egy'okukiraga.

11 Tintumula ntyo olw'okubba ndi mu kudamba, ekikoba nti, neegere embeera gyonagyaona okutanteganya.

12 Mmaite engeri y'okubba omu kudamba, era mmaite engeri y'okubbaamu nga ndi n'ebingi. Neegere ekyama ky'okubba omuntu amatiire mubuli mbeera, abba kulya kusani ooba munzala, abba kubba n'ebingi ooba mu kudamba.

13 Mpezya okubita omu mbeera egyo gyonagyaona olwa Kurisito iye ampa amaani.

14 Cooka mwakolere kusani okumbeera omu kugada kwange.

15 Era aate nga inywe ab'e Firipi mukimaite muti omu naku egyasookere egy'okulaabba egimuli aMawuliro aMasa, nga nzw'e Make-dooniya, mpaawo kanisa kadi moiza eyaganire na nze omu nsonga eenu ey'okugaba n'okusuna, okutoolaku inywe nywenkani.

<sup>16</sup> Era n'owenabbaire omu Sesalonika, mwampereirye obubbeeri omu biseera by'emirundi mibiri nga ndi omu kudamba.

<sup>17</sup> Tikiri kiti nnoonia kirabo, neye ekinnoonia, niikyo inywe okusuna enkabi.

<sup>18</sup> Era atyanu mmalire okusuna aate ebingi. Era ndi n'ebyokukolesya ebimmala atyanu nga mmalire okusuna ebirabo ebimwawaire Epafuladiito okundetera. Ebirabo ebyo biri ooti sadaaka ey'akaloosa, iyo egibaikirirya, era iyo esangaalya oKibbumba.

<sup>19</sup> Era oKibbumba wange yalibawa buli kimwetaaga, okusinzirira oku busuni w'ekitiisya obuli omu Kurisito Yesu.

<sup>20</sup> OKibbumba waiswe era oItewaiswe bamuwenge ekitiisya emirembe n'emirembe. Amina.

### *Okuseebula*

<sup>21</sup> Munsugirirye abatuukirirye bonabona omu Kurisito Yesu. Era n'aboluganda abali na nze eenu babasugiirye.

<sup>22</sup> Abatuukirirye bonabona babasugiirye, okukiraku eino abaikirirya abo abali omu lubiri lwa Kaisaali.

<sup>23</sup> Ekisa kya Musengwa oYesu Kurisito kibbe na inywe nywenanywena.



**ENdagaano eMpyaka oMu Lugwere**  
**Gwere: Endagaano Empyaka Omu Lugwere (Bible)**

copyright © 2017 Wycliffe Bible Translators, Inc.

Language: Gwere

Contributor: Wycliffe Bible Translators, Inc.

All rights reserved.

2025-05-03

---

PDF generated using Haiola and XeLaTeX on 2 May 2025 from source files  
dated 3 May 2025

03698e2d-9c8d-5b1f-bc49-b0066e860180